

Novi proces davanja naziva javnim objektima

Kao što je i nagovješteno, prilikom poništavanja odluke o mijenjanju naziva Međunarodne zračne luke, Visoki predstavnik Paddy Ashdown danas je donio Odluku kojom se definira pravni proces koji se mora poštovati u slučajevima preimenovanja javnih objekata u BiH a koji imaju međunarodni ili međuentitetski karakter.

Ovom Odlukom će se osigurati da u slučajevima kada se predloži novo ime za neki objekat ili instituciju od javnog interesa, prijedlog mora biti dostavljen Vijeću ministara BiH na odobravanje. Objekti koji su obuhvaćeni ovom Odlukom su međunarodni aerodromi, rijeke koje teku državnim granicama ili se koriste za međunarodni ili međuentitetski prevoz; pomorske luke koje se koriste za međunarodni ili međuentitetski prevoz; zgrade u kojima su smještene bh. institucije; državni granični prelazi; mostovi koji spajaju BiH sa drugim državama ili spajaju dva entiteta; ceste povezane na međunarodni ili međuentitetski cestovni promet i mostovi i tuneli povezani sa tim cestama; željezničke stanice koje su locirane na međuentitetskoj liniji ili se koriste za međuentitetski ili međunarodni saobraćaj.

U pismu premijeru Terziću, visoki predstavnik je naglasio da davanje naziva javnim objektima mora biti promatrano u kontekstu pomirenja, koje je u današnjoj BiH i dalje krhko.

“Ukoliko želimo da međunarodni karakter BiH bude neupitan, a njeni međuentitetski odnosi ostanu skladni, onda se međunarodnim i međuentitetskim javnim objektima moraju dati nazivi na način koji osigurava da ti nazivi ne uzrokuju kontraverzu u BiH ili eroziju ugleda države u inozemstvu,” napisao je Visoki predstavnik.

“Davanje naziva bi trebalo biti obavljeno na takav način da ima široku potporu konstitutivnih naroda, čime bi se odrazio temeljni konsenzus na kojem se BiH jedinstveno zasniva. Prelazak s odnosa podvojenosti utemeljenih u nepovjerenju i oprezu na odnose ukorijenjene u uzajamnom uvažavanju i povjerenju predstavlja suštinu pomirenja i očuvanja međunarodnog ugleda BiH kao stabilne multietničke države.

Siguran sam da ćete uvidjeti da je namjera ove odluke poboljšavanje unutarne harmonije i dobrog međunarodnog ugleda, koje, kao što dobro znam, osobno podržavate”, napisao je Visoki predstavnik u pismu premijeru Terziću.